

## **Predigt in Kurpfälzer Mundart**

Sonntag, 22. Juni 2014 - Evang. Kirche Brühl

Sonntag, 29. Juni 2014 - Kath. Schutzengelkirche Brühl

### ***De blinne Bartimäus sieht jetzerd sein' Weg.***

(Markus 10, 46 – 52)

Liewe G'mei, ihr liewe Christeleit!

Habt'er schun e Mol d'Reis' nach Jerusalem mitg'macht? Also sell heiter G'sellschaftsspiel, des wu so geht: In'em Raum stehe zwee Reihe vun Stühl' gegenanner uffg'stellt. Um sie rum – mit'em Rücken zu dene Stühl – bewege sich zu Musik d'Mitspieler. Sie drücke, schiewe, bremse, schlawenzle bis d'Musik uffheere dud. Donn heißt's: schnell nohocke. Denn d'Stühl' reiche ned for jedes. Eener bleibt stehe un muss ausscheide. Die annere mache weiter mit Musik, mit Stopp un de Nächst' fliegt raus, weil wieder en Stuhl fehlt. So geht's immer weiter. G'winne dud die Reis' nach Jerusalem, wer zum Schluss uff'em letzschde Stuhl hogge bleibt.

Die biblisch G'schicht', um die's heit geht, is aa so e Reis' nach Jerusalem. Un doch e ganz annere, weil do zum Schluss noch oins mehr sich mit uff d'Reis' nach Jerusalem macht. De G'winner is de Bartimäus; denn der dud de Jesus uff sei'm Weg nach Jerusalem begleite, – ned als üwwerwercher *Aadebei*, nee, als Nachfolger un Jünger, der aa donn noch zu dem Jesus halte dud, als er'n am Kreuz sterwe sieht. Un erscht recht, als Jesus als de ufferstandene Christus in Jerusalem all dene verschrockene Fraue' un Jünger erscheine dud.

Des is de Weg, den de blinne un g'heilte Bartimäus sieht un geht.

Sehe mir, liewe G'me, aa unsern Weg? Is'es en Weg, den mir finne oder aa schon g'funne hawwe? Weil mir glaawe kenne, glaawe an de Herr Jesus Christus, glaawe an de dreieinische Gott, - glaawe mit allem ruff un nunner, wie's ewe so is? De Weg mit Jesus sehe un gehe.

In de erschde Chrischdeg'mei – de Urkärch' – hod mer sich gut an de Bartimäus erinnert: Ha klor, de Bartimäus, des is de Bu' vom Timäus; von Jericho drunne im Jordantal is'er her. Schun als kloiner Kerl soll'er durch e Infektion blinn' g'worre sei. Als Bettler hod'er sich durchschlage müsse, bis'en de Herr Jesus Christus g'heilt hod. Er soll domols e gut's Plätzle zum Bettle g'habt hawwe, nämlich do, wu d'Stroß' o'fängt vun Jericho nuff nach Jerusalem: 27 km long, - Kilometer, die's in sich hawwe. Jericho 275 m unner'm Meerespiegel un Jerusalem 740 m hoch, bei dene üwwer 1.000 m Höhe'unnerschied kummsch'd ins Schwitze, moin Liewer!

Seller Bartimäus hoggt do an sei'm Plätzle. En große Mantel dud'en schütze bei Wind un Rege', gege' d'Kält' wie aa gege' d'brennend Sunn'. Er kann sich awwer aa drunner versteckle, wenn'er's nimmer höre kann, was manche Leit' so saudumm babble üwer die dreckische Schmarotzer am Wegrund. Er sieht zwar nix, de Bartimäus, awwer er spürt die Blick' vun sellene, - Blick', die töte könne. Er schämt sich, dass'er als Blinner bettle un am Rand vun de G'sellschaft lewe muss, als en Ausg'stoßener, als eener, der mit de annere Leit' z'samme weder bete noch Gottesdienst' fei're derf. *Warum denn? Ich kann doch nix defier, dass ich blinn' g'worre bin!*, so säch(g)d'er sich immer wieder.

De Bartimäus hoggt an sei'm Plätzle un dud im milde Gabe bitte. G'rad jetzterd is wieder e gute Zeit. Viel mehr Leit' als sunst sin uff de Stroß unnerwegs nuff nach Jerusalem. Die welle alle s'Passahfest in de heilische Stadt fei're. Drowwe uff'em Berg Zion, in de Stadt Davids, im prächtige Tempel. Oh, was gäb'er drum, ä Mol do debei sei zu derfe, debei sei zu könne, - die Reis' nach Jerusalem mitz'mache, - ich, de blinne Bartimäus!

Mansches Jahr hoggt'er jo schon an sei'm Plätzle. Un do hod'er mitkriegt, was die Leit' so alles verzähle von ihre Reise nach Jerusalem. G'rad die Pilger, die fast immer in Gruppe' unnerwegs sin, flippe fast aus, wenn's se vom Tempel, vom Haus Gottes schwärme un die alte Psalme vor sich hersage: *Wie lieb sind mir deine Wohnungen, Herr Zebaoth. Meine Seele verlangt und sehnt sich nach den Vorhöfen des Herrn; mein Leib und Seele freuen sich an dem lebendigen Gott* (Ps 84, 2f). Ach, er kennt sie jo die Psalme. Oh, er möcht' se mitbete owwe in Jerusalem! Er möchte'se mitsinge – als sei' Lied, in dem was von sei'm Lewe vorkomme dud.

Natürlich kennt'er aa all die Hoffnungen uff en Erlöser, uff de Messias, der kumme soll. Aus'em Stamm Isais soll'er kumme der neie, große König, uff dem de Geist des Herrn ruht. Blinne solle' donn sehe un Lahme gehen könne. En Sohn Davids soll's sei, der des alles vollbringe wird. Oh, wie wär' des schä, wenn ich, de blinne Bartimäus des noch erlewe könnt'.

Jo, er hod sei Träum', de Bartimäus, wenn'er an sei'm Plätzle hoggt. Un wie immer spitzt'er sei' Ohre, um möglichst viel mitz'kriege von dem, was d'Leit schwätze. Er hod g'merkt, dass'es in de letsche Täg' bei de meiste Pilger wie aa bei de Bewohner vun Jericho praktisch nur ä Thema gibt: der große Rabbi Jesus aus de Provinz im Norde. Der is jetzterd in Jericho drin un will mit seine zwölf Jünger un viel' annere noch nuff nach Jerusalem, um dort s'Passahfescht zu feire. Was'se alles vom dem verzähle! Preddische soll der könne – so, dass mer's aa verstehe kann, - mit Gleichnisse aus'em Alltag. Zeiche un Wunner soll'er mache: Blinne sehe, Lahme gehe, Leprakranke were g'heilt, sogar Tote solle ufferstanne sei. Un g'rad geschterd, so verzähle'se, soll'er in de Stadt drin de Boss vum Zoll, den Owerschlawiener Zächäus, in dem sei'm Haus b'sucht hawwe. Um de Zächäus, mer sod's ned glaawe, war dodevu so begeischerd, dass er g'sagt hod, ich werd' en bessere Mensch un du desdewege all die Leit', die ich b'schisse hab, vierfach entschädige.

Was is des vor eener, seller Jesus? Er wird bewunnert un verehrt von de Leit'. Hoffnungen un Wünsche were uff ihn projiziert.

Es liegt was in de Luft. Werd'er die alte biblische Verheißunge fürs Volk Gottes erfülle? Werd'er Israel erlöse? Un die Römer aus'em Land rauschmeiße? Die groß' Froog is: Was werd'er jetzterd in Jersalem drowe mache? Keener will so rischtig raus mit de Sprooch. Manche munkte, er sei de erwartete Messias. Von seine Jünger gibt's so O(n)deutungen; awwer sage derfe'se nix g'naues. Ihr Meister hod's'ne verbodde. Un dann soll'er von sich, dem Mensche'sohn, g'sagt hawwe, dass'er verhaftet were soll, leide un sterwe werd, awwer nach drei Täg' wieder däd ufferstehe. Soll eener noch draus schlau were.

Unser Bartimäus hod immer interessiert zug'hört. Er saugt's in sich uff wie en trockene Schwamm. Long hod'er sich b'sunne un dann dud er uff ä Mol alles ganz klor sehe: Der Mensch, Jesus, is vun Gott g'schickt wore. Der is mei' Hoffnung, is mein Glaawe, is mei' Chance.

Um sei' Plätzle rum wird's uff ä Mol ganz eng un laut, s'werd g'schobe un gedrückt. Bal(d) kriegt'er mit, dass do in der große Meng' de Jesus sei' muss. Wu g'nau is'er? Wie kann ich mit dem Kontakt kriege. Er is doch mei' Hoffnung, mein Glaawe, mei' Chance! Schnell merkt'er: bei dene viele Leit hilft nur brülle, saumäßig brülle.

3

Des macht'er donn. Er lässt en Brüller los wie en Donnerschlag. E Krächze is'es voller Verzweiflung, als ob en Wahnsinniger tobe däd: *He, du! Horsch ä Mol! Jesus, du Sohn vum David, hab' Erbarme mit mer!*

Die Leit' könne's erst gar ned verstehe. Sie höre nur Kreische un welle den Krawallmacher ruhig stelle: *Halt d'Gosch'!* Doch de Bartimäus schert sich ned drum, er is richtisch in Fahrt kumme un legt noch en Zahn zu: *Jesus, du Sohn vum David, hab' Erbarme mit mer!*

Es is e *kyrie eleison*, - *Herr, erbarme dich*, liewe G'me, des ganz annerschd klingt wie die so schee g'sungene liturgische Stück' in uns're Gottesdienst'.

Un donn kapiere awwer die Leit' un vor allem die Jünger erschd e Mol, mit welle Wort' seller Blinne ihr'n Herrn un Meister o(n)rede dud: *Jesus, du Sohn vum David!* So ebbes! Politisch üwwerhaupt ned korrekt! Des hod noch koiner zu sage g'wagt. Un wer hod's g'wagt? Oh je, en blinne Bettler, en Ausg'schlossener, en Nobody, den mer gern üwwersieht am Stroßerand. Soll so eener durchblicke?

Un wege so oim bleibt de Jesus uff ä Mol stehe. Er hod den Kriescher noch ned g'sehe. *Schickt'en mol her*, säch(g)d'er. Un all' sin g'spannt wie en Flitzeboge, wie's weitergeht. Werd sich Jesus erkläre un sage: *Jawoll, seller Mann dort hod recht: Ich bin de Messias.* Oder werd er'n runnerputze un sage: *Was fällt denn dir ei(n), so ebbes zu behaupte!* Oder gibt's wieder e Wunderheilung vun dem Heiland un Rabbi? Die Leit' rechle mit allem.

De Bartimäus hod des noch ned ganz mitkriegt, er is immer noch hibbelisch. Doch die Leit', die'en ewe noch g'heiße hawwe, sei Gosch' z'halte, ruf'en jetzerd un rede uff'en ein: *Ruhisch Blut, es werd alles gut; steh mol uff, de Jesus schickt noch'der.*

Kenne mir uns vorstelle, ihr liewe Leit', was jetzerd in dem Bartimäus alles vorgeht?

Er is wie elektrisiert. Z'erst schmeißt mol sein Mantel hinner sich. Er brauch't'en jo nimmer als Schutz. Befreit springt' er uff vun sei'm Plätzle, streckt sei' Ärm' aus, ums Gleich'wicht zu halte un tastend sein' Weg no zum Jesus zu suche'. Gut, es fällt'em leichter, weil die Leit' ihm e Gässle mache. So kommt zum Jesus un steht vor'em mit Herzbubbere: Mei' Hoffnung, mein Glaawe, mei' Chance!

Sie stehe sich gegenüwwer: Jesus un Bartimäus. Er kann sich jo denke, de Jesus, was der blinne Bettler von'em möcht'. Awwer des is jetzerd ned de Punkt. Jesus spürt un sieht, dass der armselige Mann e Hoffnung un en Glaawe hod un sei Chance nutze will. Drum stellt er'm die oifache un klor Froog: *Sag mer bitte, was ich for dich du un mache soll?*

Er frogd ned herablassend: *Na, moin Liewer, wo drückt denn uns de Schuh?* Nee, es klingt so, als ob ein Diener vun seim' Herrn en Befehl ei'hole dud: *Was soll ich mache?* Ned: was kann, sondern: was soll ich mache? Merkt'er de Unnerschied? Jesus will de Diener sei' for de blinne Bartimäus, der voll Hoffnung un Glaawe is. Des is des oine. Des annere is, dass de Jesus vun dem Bartimäus ganz g'nau wisse will, uff was er hoffe un an wen er glaawe dud

un welle Chance er nutze will. Un der antwortet donn schlicht, treuherzig, ruhig un doch bestimmt: *Rabbuni, ich will wieder sehe könne.*

Mehr braucht'er ned zu sage. Is jo schon s'Wichtigeste g'sagt un gedacht wore. E stilles Oi(n)verständnis b'steht zwische` ihm un Jesus, der for de Bartimäus jetzerd de Herr vun sei'm Lewe is. Er hod sein` Weg g'funne.

4

Un de Jesus braucht ned mehr zu sage als: *Geh weiter, dein Glaawe hod'er g'holfe.*

Es is so en Glaawe, der Berge versetze kann un drum aa Blinne wieder s'Augenlicht gibt.

De Bartimäus sieht jetzerd sein` Weg. Dankbar, glücklich un z'friede` is'er. Endlich kann'er die Psalme un Lieder mitsinge – drowwe in Jerusalem. Lieder, in dene sei schweres un jetzerd so befreites Lewe zum Klinge kummt.

De Bartimäus fasst donn en spontane Entschluss: Ich werd' mei'm Herr Jesus nachfolge. Ich geh sein` Weg mit, ich mach` die Reis nuff nach Jerusalem mit. Ich seh` mein` Weg un ich bleib uff dem Weg.

Sein Glaawe hod'em e neu's Lewe g'schenkt. An sei'm Glaawe werd'er festhalte, aa dann, wenn'er gebeutel't werd un er s'Kreuz uff sich nemme muss, oder er Zweifel hod un manchmol hadere muss. Denn sei` Hoffnung werd weiter lewe. Sie werd'em nie sterbe, weil so e starke Hoffung ihn ins ewige Lewe führe dud – drowwe im himmlische Jerusalem.

Klor, de Bartimäus sieht jetzerd sein` Weg.

Un mir, ihr liewe Christeleit`, sehe mir unser'n eigene un gute Weg? Oder hogge'mer noch blinn neue uns am Wegrand? Als moderne Bettler, die gierig all des uffgreife, was irgendwie „in“ is: an life-style, an sog. Lebensweisheite` oder Lebendummheite`.

Wie de Bartimäus an sei'm Wegrand, liewe G'mei, hawwe mir im Lauf vun unserm Lewe viel vum christliche Glaawe g'hört un g'lernt, erlebt un praktiziert, - mol voll debei, mitte uff'em Weg un mitte im Lewe. Donn ware'mer vielleicht enttäuscht un verletzt, ware stur un eitel, - ware eher am Wegrand oder hawwe g'moint, alles besser zu wisse`. Hawwe mer donn wieder de gute un richtige Weg g'funne? Oh, do könnt' wohl jeder sei` eige's G'schichtle verzähle.

For die Hoffnung, de gute un richtige Weg zum lebendige Glaawe zu finne und zu sehe – oder aa uff dem Weg zu bleiwe oder z'rückzufinde, hod uns de Bartimäus e gut's Beispiel gewwe. Er hod de Herr Jesus um Erbarme og'rufe un hod dann e ganz konkret` Bitt` g'nannt: *Dass ich wieder sehe kann.* So könne un dürfe mir unser'm Herrn Jesus aa konkret g'nau des oine sage un bekenne, was uns zu schaffe macht un uns irgendwie blockiere dud.

Un was were wohl vun unser'm Herrn un Heiland Jesus Christus als Antwort höre? Sie werd uns erstaune: *Geh weiter, dein Glaawe hod der g'holfe.* Wirklich – de Glaawe. Denn der is jo schon in uns drin, do drin im Herz - seit uns'rer Tauf! Er will nur immer wieder g'weckt, aktiviert, bestätigt, lebendig were. Donn seh` ich aa mein gute un richtige Weg wieder un hab` de Durchblick. Un kann mit viele annere Leit z'samme` uff'em Weg vum Glaawe gehe` un dodebei wie de Bartimäus fröhlich un dankbar mei Lied singe`. E Lied, in dem mei` eige's Lewe klingt – voll Glaawe, voll Hoffnung un mit de Chance, mein Weg mit Jesus immer wieder zu finne und zu sehe wie auch druff zu bleiwe.

Amen.

Pfarrer i.R. Oskar Ackermann

Brühl / Baden